

I tims borascjôs dal patriarcje Pelegrin

Furlan, e probabilmèntri cividalês, di nassince se no di gjarnazie, al veve di jessi il patriarcje Pelegrin II, che al guviernà la glesie di Aquilee e il Friûl fra i ultins agns dal imperi di Indrì VI e i prins dal borascjôs interval che al precedè il ricognossiment di Fidrì II. No si sa nuie de sô famee, ma si po crodi che al dissendès di cualchi maiorent che al divignive di là des Alps apartignint ae cort dai patriarcjis di prime.

In fats i canonics di Cividât e Aquilee, fra i cuai al fasarà part a un ciert pont Pelegrin in posizion di rilêf, a jerin in chel timp scuasit ducj di origine gjermaniche. Sclarît un tant, al è probabil che al sedi stât tirât sù inte scuele patriarcjâl di Cividât e che si sedi distint par sapienzie e judizi.

Tal 1173 al veve za cuistade la alte incarghe di preposit, tal cjapitul cividalês; e tal 1184 al jere ancje arcidiacon di Aquilee, e partant trasferît al di chê basiliche, par vie che chest ufici al compuartave la residence: al conservave dut cês il titul, e i redits, de prepositure, che a vevin di jessi alts e che i forin confermâts dal pape Celestin III ancje daspò la promoziun ae sede patriarcjâl. La sô elezion, co no si cjate olme di contestazions intai documents, si po pensâ che si sedi davuelte cence intrics di sorte de bande dal cjapitul aquileiês, ae fin dal 1194. Cui che al jere stât patriarcje denant di lui, o sei Gotifrêt, al jere muart ai 9 di Otubar di chel an. Ma prime de consacrazion episcopâl al scugnì otignî la conferme e la investidure feudâl de bande dal imperadôr, e chest al sucedè tal mê di Jugn daspò, a Com, dulà che inmò si cjatave Indrì VI denant di tornâ in Gjermanie.

I dîs agns di guvier di Pelegrin (1195 – 1204) al fo un periodi une vore dificil pe ativitât temporâl dal patriarcje, mentri nol risulte che al vebi cjatât grancj contrascj inte aministrazion ecclesiastiche. L'imperadôr Fidrì, intai ultins doi agns de sô vite movimentade al fo dal dut ocupât in Gjermanie par sigurâ la sucession dal fi Fidrì II e in Sicilie par domâ la rivolte guelfe; e cu la sô muart al scomençà un timp balfueriôs, dilunc il cuâl i contendents che a smiravin ae sucession – Filip di Hohenstaufen, fradi dal defont, e Oton di Brunswick – si scombaterin fra di lôr cence remission. Pelegrin al jere puartât a sostignî il Svêf, ma in obediencia al pape, si declarà estrani ae competizion. Cheste condizion par altri lu disprivà di ogni poie de bande dal podê imperiâl e lu esponè ae prepotencis e ai atacs, di une bande dai Trevisans, e di chê altre dai conts di Gurize. A chest al va zontât il disordin aministratîf dulà che il so predecessôr al veve lassât il patriarcjât.

In fats il prin at di Piligrin e je stade la publicazion fate a Cividât, un mê daspò de investidure, di un riscrit imperiâl dulà che a vignivin anuladis dutis lis alienazions e infeudazions otignudis dal patriarcje Gotifrêt dilunc la sô lungje malatie.

La vuere cun Trevîs e jere une altre pesante ereditât lassade di Gotifrêt: une lote scomençade di chel comun tal doman de pâs di Costance. In lôr jutori i Trevisans a verin ancje il cont di Gurize, avocat de Glesie aquileiês, e pûr scuasit simpri nemì de midiesime. Cjapât tra doi fûcs, Pelegrin al scugnì cirî di disbroiâse miei che al podeve e, in mancjance dal sostegn imperiâl, al cjatà la

poie di Vignesie, tentant in cheste maniere di risolti lis cuestions daviertis mediant arbitrâts. Chest in fin al sucedè tal 1203.

L'intervent dal Gurizan al fo par altri ocasion di une sistemazion definitive dai rapuarts tra i conts di Gurize e il patriarcje. In fats, tal 1202, i duchis di Austrie, dal Staiar, di Meranie, de Carintie e dal Tirôl, oltri a altris princips interessâts ae lote fra Filip di Hohenstaufen e Oton di Brunswick, cul fin di creâ une leghe fuerte tra la Gjermanie dal Misdì, Vignesie e il patriarcjât, si cjatarin in cunvigne a San Quirin daprûf Cormons. In chê dade si fevelà ancje de condote Eghelbert III di Gurize, che si jere metût in leghe cui Trevisans. Cussì si stabilì che il cont di Gurize al ricognossès la sô dipendence dal patriarcje pai feuts furlans e che al davuelzès pardabon il compit di avocat de Glesie di Aquilee. Cheste sentence, pronunciade ai 13 di Dicembar di chel an, e rapresente un document une vore impuartant pe cognossince de complicate rêt di rapuarts che fo proprie dal feudalesim furlan. Di chest at al risulte che il cont di Gurize al esercitave, sui teritoris patriarcjâi a lui infeudâts, podês plui slargjâts di ogni altri siôr a Jevât dal Taiament. Simpri il cont di Gurize, par altri, al possedeve slargjâts feuts tal todesc di là des monts, pai cuâi nol dipendev dal patriarcje. Ma il document al palese inmò la impuortance decisive che e stave cuistant la curie dai vassai (de cuâl ancje il Gurizan al faseve part) ven a stâi chel che po al deventarà il "Parlament de Patrie"; de curie in fats a dipendevin bielzà oltri che la ripartizion dai impegnis tributaris, lis deliberazions che a rivuardavin i interes comuns, i judizis civîi e criminâi e, in gjenar, i procès dulà che a fossin coinvoltis i vassai dal patriarcje.

Ai 20 di Fevrâr dal 1204, in Sante Marie de Plêf di Glemone, Pelegrin cuntune numerose cort di siôrs ecclesiastics e laics, al assistè al maridaç di Azzo d'Este cun Alisie principesse di Antiochie: chest al è l'ultin so at dal cuâl e je restade testimoniance. Al murì il mêsi di Mai daspò e al fo sapulît inte basiliche di Aquilee.

De sô gjenerositât viers glesiis e munistîrs dal Friûl e je restade une slargjade memorie e ancje cualchi monument: prin fra ducj la ancora retangulâr di arint aurât pe glesie di Cividât: opare di grande oresinerie influençade, tal tritic centrâl, dai mûts bizantins presints inte art veneziane.

(Josef Marchet – dai "Il Friuli: uomini e tempi" - test ridusût e voltât par furlan par cure de redazion di Ladins dal Friûl, n° 9 di Setembar 2014)